

Te cösc ann dles vocaziuns él sö **Oies vigne vendres dales 16:30 ales 18:00** la poscibilitè da s'encunté, se baié fora, se confessé. Chisc é i proscimi termins:

03.05	sig. Tone Fiung	31.05	sig. Franz Sottara
10.05	Pater Franz Senfter	07.06	sig. Heinrich Ellecosta
17.05	sig. Andreas Perathoner	14.06	sig. Heinrich Perathoner
24.05	sig. degan Jakob Willeit		


Vita de ploania y de paisc


“I te cherdì con to ennom” dij le Signur.

La ploania d'La Pli tol sö con ligreza te söa comunité **Nina Ellecosta** (La Pli) y ti fej les miús aodanzes ai geniturs Albert y Anita: che Nina pói cresce tla fede, vire tla speranza y sperimenté l'amur de Chelbeldio y dla jont.

- **Enformaziun dal consei pastoral – program dles funziuns de ma:**
 - vigne dedolönesc y sabeda** do messa funziun a Santa Maria
 - vigne dedolönesc** ales 20:00 corona te capela da Miscí
 - vigne sera** ales 20:00 corona te capela a Longega
 - dedemesaledema:** de d'oraziun te familia
 - lönesc, ai 06:** te dlìjia con i crejimandi por perié do la forza dal Spirit Sant
 - lönesc, ai 13:** te dlìjia con l'Uniun dles Eres por les families
 - lönesc, ai 20:** te dlìjia con i neocomunicandi por ringrazié dal Sacramont dla Pröma Santa Comegnun
 - lönesc, ai 27:** te dlìjia con l'Uniun dai ei por perié do vocaziuns

1 enformaziuns y termins

Encuntada con la Bibia: en lönesc ai 29 d'aurí ales 20:15 él te salf de calogna d'Al Plan na encuntada de reflasciun sön la Bibia con signor Sepl Granruaz. Düc é enviés.

KVW Senioreclub: al ven lascé alessei che le pelegrinaje a Cembra, programé por i 9 de ma, ven sposté ai 23 de ma.

Zenter Families Mareo: con ligreza enviunse les families y düc i interessés ala sontada generala dal Zenter Families Mareo, jöbia ai 2 de ma, ales 20:00 tal salf dla ploania. Deplü enformaziuns y ince le program dles ativités ciafon sot a:

<http://www.valbadiaonline.it/comunite/uniuns/zenter-families-mareo>

Döt le bun a: Florian Terza * 03.05.1921
 Jep Rindler * 03.05.1938
 Anna Taibon ved. Pedevilla * 04.05.1932
 y a düc chi co á santennom y compless i agn cöst'edema

Impressum: Ploania d'La Pli; redaziun Franz Rigo y Edith Willeit
Comunicaziuns cina le **dedemesaledema** sera a Franz Rigo: ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania

La Pli de Mareo

Santa Maria dal Bun Consei

Ploian: Signor Heinrich Perathoner
 E-mail: ploania@gmx.net

Calogna Al Plan: 0474 501006
 Radio de Ploania: 93,00 MhZ



Ann C

28.04.2019 - Secunda domegna de Pasca
Domegna bianca

n. 22

Mio Signur y mio Dio!

📖 **St.Ap 5, 12–16 | Rev 1, 9–11a.12–13.17–19 | Jan 20, 19–31**


Dal Vangelo do San Jan:

[...] ²⁶Otedé do ea sü discepui endô abinés adöm, y Tomesc ea lapró. Danló é gnü Gejú – les portes ea slütes pro – é jü amesa ei ete y á dit: Pêsc a os! ²⁷Spo ti ál dit a Tomesc: Ten ca to deit – atló é mies mans! Ten ca tóa man y metela te mio costá, y ne sté a ester descredent, mo credent! ²⁸Tomesc ti á respognü: Mio Signur y mio Dio! ²⁹Gejú ti á dit: Deache te m'as odü, creieste. Beac é chi co ne veiga nia y crei empó. ³⁰Ciamó trec d'atri segns, che n'é nia scric sö te cösc liber, él sté Gejú co á fat dan dai edli de sü discepui. ³¹Mo chisc é gnüs scric sö ch'i cherdeise che Crist é le Messia, le Fi de Dio, y ch'i eise, tres la fede, la vita te so ennom.

Oraziun dal de

Periun! Dio misericordius, con la festa de Pasca renoveieste vign'ann la fede de to popul: láscesse conesce tres plü sot la richeza dal bato, te chel ch'i sun gnüs purifichés, la potenza de to Spirit, te chel ch'i renasciun, le valur dal sanch, tres chel ch'i sun gnüs cumprés ciará. Do cösc te periunse por nosc Signur Gejú Crist, to Fi, co é Dio y vir y regneia con te tl'unité dal Spirit Sant por düc i secui dai secui. – Amen.

(Lezionar C)



📖 **Letöres dla Terza domegna de Pasca:**

St.Ap 5, 27b–32.40b–41 | Rev 5, 11–14 | Jan 21, 1–19

Edema liturgica dai 28.04. ai 05.05.2019

DOM 28.	Secunda domegna de Pasca Domegna blancia Domegna dla misericordia de Chelbeldio
08:30	gran messa por dōta la ploania con prejentaziun dai crejimanc 3^a s.m. de sopoltōra por † Jan Maneschg, da Poz y corona dla comunité → <i>offerta por le fonds de solidarieté por le clerus</i>
14:30	<i>a Pliscia</i> , s.m. de rengraziamont en onú de San Iorz ♪ <i>grup de stromonc</i> s.m. por vis y defonti dles families Kastunger dal Mone
14:30	funziun dal Bato de Nina Ellecosta
Lön 29. 07:30	<i>Caterina da Siena (patrona d'Europa), Roswita, Robert</i> <i>s.m. a Al Plan</i>
Ded 30. 07:30	<i>Pio V., Hildegard, Rosamunde, Bernhard</i> s.m. por † Agnese Ellecosta ved. Erlacher, Ombolt s.m. por porsones amarades s.m. por † Regina Ellecosta, Stifler
Dem 01. 18:00	<i>Ojöp laurant, Augustin, Arnold, Maximilian</i> <i>s.m. a Al Plan</i>
Jöb 02. 19:30	<i>Atanase, Sigismund - de d'oraziun do vocaziuns</i> s.m. d'aniversar por † Canzio Willeit, Blaje s.m. d'aniversar por † Jep Ellecosta, Taibun/Ombolt s.m. por †† Pasquale Winkler y Josef Kosta
Ven 03. 9:30 ca. 19:30	pröm vendres - festa dai sanc apostui Filippo y Iaco, Alexander signor ploan va a proveder s.m. de n grup de pelegriuns da Oberösterreich s.m. por † Jep Rovara, Plans s.m. por les Püres Armes, funziun al Sacher Cör
Sab 04. 07:30	gran festa dai Patronns diozejagn Ciascian y Vigile <i>Florian (patron da Curt), Guido, Valeria</i> s.m. en onú de Santa Maria d'La Pli, s.m. de rengraziamont
DOM 05.	Terza domegna de Pasca Domegna de San Ciascian y San Vigile (Kassiansontag) San Florian <i>Max, Angelo, Iuta</i>
→ 08:00	gran messa por dōta la ploania → <i>offerta por i l'Università Catolica de Milan</i>
→ 08:30	prozesciun a Curt con benedisciun dal rü d'La Pli, 2 vangeli, s.m. en onú de San Florian do int. dai Stödafüs d'La Pli y d'Al Plan ♪ <i>Musiga d'La Pli</i>
<i>ampola:</i>	por la familia dal Craizer
<i>ministronc:</i>	▶ da doman y domegna: <i>Elias y Sabine</i> ▶ da sera y domegna: <i>Eliane y Emilie</i>
<i>i recordun:</i>	Maria Trebo Wilhelm, <i>Paisc Todesc</i> + 30.04.2015 Canzio Willeit + 01.05.2009 Jep Ellecosta, <i>Taibun/Ombolt</i> + 02.05.2011 Signor Franz Agreiter SDB, <i>Brasil</i> + 03.05.2009



Segn por se dé da conesce: pláies d'amur (Jan 20, 19–31)

I ponsi do

*La pröma scincunda dal
Rosserí é la pêsc.
Na scincunda preziosa,
co ti á costé la vita a
Gejú, na scincunda co va
sot tal cör de vigne
porsona y la met en pêsc
con Chelbeldio y con i
fredesc.
Gejú se dá da conesce
ales plaies dai agüs,
segns de söa pasciun.
Ciafé Gejú é saurí: al
basta le cherí danter
chi co patesc dolurs y
iniustizies.*

I preii ensciö

I preii ensciö: Móstresse ince a nos, Signur, te töes mans ferides y te tū pisc trapassés dai agüs dai soldás. Te chisc segns n'odunse nia ma dolur y soferenza mo dandadöt pêsc y speranza. Móstresse to cör scarzé dala lanza! El ne conesc nia senn y vendeta, mo pordonn y amur. Dásse edli co veig' sora le dolur fora por odei na doman nea dal bun. Daür sö nosta mont ch'ara sii bona da n'odei nia ma döt ci co é slet y rio, mo ci co é bun, iüst y bel. Daür sö nosc cör che al sii bun da tó sö, desco le to, les speranzas, les ligrezes y les consolaziuns dla vita. Desche Tomesc met söa man sön to corp ferí, ensciö lascia che nos ti junse pormez ai fredesc co patesc y te odunse te y dijunse: "Mio Signur y mio Dio". I cherdun en te, i sperun te te, i t'orun bun ma a te.



“Con ligreza sön tru” – dal sfei de preparaziun ala Confermaziun

I creii te Dio

Chelbeldio ti fej sontí a vigne porsona da ester val de particular. Al ti á dé a dōtes y dūc nos d'atres cualités. Chelbeldio é dagnora atló por nos, ince canche i minun che ara na vái nia plü ennant. Ara va entrés danö. Al nes lascia ince tó dezijiuns falades, por ch'i emprunse ince da nüsc fai. Chelbeldio nes azeta desch'i sun, mo al nes mostra ince che degügn n'é perfec y zonza fai.
dal CREDO de na möta de 12 agn

I creii te Gejú Crist

I creii che Gejú mo acompagneii. I creii che Gejú nes mostri le tru. Gejú é dlungia me canche i ne sa nia plü da jí ennant. I creii che Gejú mo dá coraji. I creii che Gejú nes dá confort. Gejú Crist nes scinca fidonza y forza. I pó mo lascé sön Gejú, desco el sön me. I creii che Gejú ái creta te nos y che al nes la scinchi ennant. I creii che Gejú Crist nes scinchi ennant speranza a nos porsones.
dal CREDO de n grup dla crejima

I creii tal Spirit Sant

I creii che le Spirit Sant sii n interzessur.
I creii che le Spirit Sant nes abraceii y che al sii etern.
I creii che le Spirit Sant nes ascuta dagnora sö canche i dijun val.
I creii che le Spirit Sant nes ascuti dagnora sö y nes dá conseis tai ri momonc.
I creii che le Spirit Sant nes pordoni döt.
I creii che al nes dá forza, nes acompagneii y nes custodesci.
Le Spirit Sant mo dá speranza y scinca vita.
I creii che le Spirit Sant mo feji gní lede.
dal CREDO de mitans y mituns co ven confermés de totes y toc